

大雲山房文彙

氏俱

贈夫人公年始十五補充州府學生二十補廩膳生二十  
三充拔貢生二十五考取八旗官學教習二十六補正藍  
旗官學教習應順天鄉試中式二十七引

見以教諭用二十八選觀城縣學教諭

純皇帝乾隆元年公舉博學鴻詞

御試列二等第三名授翰林院檢討年三十六矣三十八  
奉

特旨改名藻

記名以御史用充順天鄉試同考官三十九充會試同考

官升右春坊右中允升侍講轉侍讀

上書房行走四十升太常寺少卿轉通政司右通政升都察院左僉都御史自公爲檢討至僉都御史皆

純皇帝特簡在廷以爲榮是時

純皇帝御極已五年躬節儉以率天下而海內無事物力充殷公虞有以豐豫之說進者凡園囿燕遊暫御之事屢愷切言之

純皇帝悉嘉納四十一升內閣學士充順天鄉試正考官充江蘇學政四十三以失察寶應縣學生劉洞罪狀降三級調用補宗人府府丞至京仍

上書房行走六月以母張大夫年老乞養親得

允五十奔皇長子定安親王之喪至京

賜復內閣學士原銜五十四丁張太夫人憂五十六服闋  
時

純皇帝幸闕里公送

駕至德州授陝西布政使公在籍侍養凡十有二年年譜  
中止載

朝廷賜予並所奉

溫旨敬次至此焜復泣曰先少保在養親假中至德州迎  
駕者二入都祝

皇太后萬壽者一始奔 皇長子定安親王之喪繼奔  
孝賢皇后之喪其餘日朝夕侍張太夫人飲食起居皆躬  
事蓋事親以事

君不敢欺如此是時准噶爾豪賊阿睦爾撒納內附復叛  
官軍剿之公始之官陝西察哈爾吉林兵方由陝西赴軍  
自潼關廳至長武縣東西八百里設軍臺七所其平道分  
設車三百輛騎七百匹其山道分設騎千五百五十匹臺  
設草六十萬斤豆二千石公日與按察使驛傳道釐其事  
軍行無留直隸送軍前馬萬一百六十匹駱駝千六百頭  
陝西送軍前羸千二百頭四川送軍前馬千三百九十匹

過陝西亦無留明年定邊將軍兆惠遂連戰破賊阿睦爾  
撒納走死五十七調湖北布政使升雲南巡撫雲南運京  
銅下四川峽險甚自乾隆四年至二十一年共沈三百十  
九萬四千一十五斤戶部奏雲南四正運運原額京銅二  
加運運廣西停鑄之銅而第二運至峽當四五六前後三  
月江漲之時多失事議分二運于前後五運以避險公以  
正運乃解官顧船加運自漢口以上卽地方官撥船合之  
不便議併四正運爲三運二加運爲一運八月自瀘州開  
第一運十月開第二運十二月開第三運次年二月開加  
運每年止四運而四五六七前後四月無銅船出峽于避

險爲益慎奉

旨依議六十三署貴州巡撫加太子少保六十四回雲南  
巡撫任升雲貴總督六十五加兵部尙書銜雲貴西南二  
面俱鄰緬甸西爲永昌南爲普洱是時緬甸貴家土司官  
裏雁與木疏酋戰敗竄孟坑其妻囊占率衆內附我孟連  
土司刀派春脇取其貲囊占怒殺派春永昌知府楊重敷  
遂誘誅宮裏雁囊占走煽緬甸諸土司犯邊公方撥土練  
守永昌而普洱之孟艮土司有族人召散者糾緬甸賊數  
千攻掠九龍江等地甚猖獗公馳至普洱遣總兵劉成得  
參將劉明智往剿焉先是公在雲南雲南無事垂十年

純皇帝倚任無與比一旦東西皆擾公內不自安而參將何瓊詔遊擊明誥守備楊坤違節制擅渡九龍江大敗潰卒還以三人戰沒告方入奏而三人自緬甸遁還公益不自安當三人逗撓律而

純皇帝以三人乃臨陣退縮皆斬奉

旨降公湖北巡撫公望

闕叩首如禮閉戶作書處後事擲筆抽佩刀自刎時乾隆三十一年二月二十三也年六十六後一月部議至雲南以前事革職公娶徐氏繼娶田氏再繼娶李氏長子本荷澤縣附貢生次子木山西蒲州府同知季子林候選布政



司經歷孫焜壬子舉人前知江西南康龍泉縣今署餘干縣次子木出敬於是復于焜曰古者大臣有坐盤水加劍造請室而請罪小罪自弛大罪北面自裁其三公則賜之上尊養牛使者中道因以不起聞若是者雖以禮相切直與取而殺之無異也至蓋寬饒蕭望之朱博皆以下吏就死其畏罪與辱明甚今公始左遷

純皇帝遇夙厚可復用而奮不自顧至于如此蓋公事皇上誠至一不得當卽以爲孤負

明恩無以自立于天下此蓋古人所難非蓋寬饒蕭望之朱博諸君子等不可以不銘於是系之銘曰

至聖御宇禮及大臣非賄非奸皆釋以

恩惟公之咎成于將士

天子仁明左遷則已觥觥我公志古臯夔一告不汙星隕  
山頽命牘抽豪爰摭厥志刻之廷陳告千萬世

兵部侍郎銜署直隸總督裘公神道碑銘

公諱行簡字敬之姓裘氏始祖萬頃仕宋爲大理寺司直  
自會稽遷新建遂世爲江西南昌府新建縣人曾祖琅歲  
貢生祖君弼刑科給事中父曰修太子少傅工部尙書諡  
文達妣一品夫人熊氏文達公生子四長麟翰林院編修  
次師國子監生皆早卒次卽公次行恕湖北漢陽縣知縣  
公年二十丁文達公艱服闋

高宗純皇帝欽賜舉人內閣中書推文達公

舊恩也旋直軍機處遷侍讀擢山西甯武府知府調平陽  
府以熊太夫人年老請內用補戶部陝西司員外郎仍直

軍機處升刑部福建司郎中

本朝之制凡章奏陳達

制詔宣降軍機大臣取

進止章京行之內閣六部或徑下各直省及外藩公在直  
二十餘年內嫻掌故外悉四方之政於是朝野之論皆以  
爲能可大用

今上加意人才大臣多以公名舉奏升內閣侍讀學士奉  
命祭南海是時教匪未靖經略額勒登保公駐略陽公奏  
請陝西四川帶兵大臣扼衝嚴守使陝匪不入川川匪不  
入陝然後逼使東竄經略以大兵威之可計日梟縛復

命後升太僕寺少卿奉

特旨偕大理寺少卿窩里額公犒軍公奏請自寶雞至褒城棧道兵卡宜復設且於要害設大營隔賊走路兼通大軍糧運而其時經略引嫌請止舉劾麾下功罪公奏請五路帶兵大臣所統將士皆聽舉劾移書四川總督威勤伯勒保公爲陳廉頗藺相如相下之義兩帥大和公論事多中機宜得大體類如此途次鳳縣升太僕寺卿次西安除河南布政使調江甯布政使

賜花翎丁熊太夫人艱未禫除福建布政使旋調直隸布政使兼按察使護直隸總督先是天下大政事賑貸轉輸

供億皆以州縣爲經由數滙錢穀出入多未釐正  
高宗純皇帝欲以曠蕩之恩滌之暨

今上登極

下詔盡免廢負而地方大吏鉤稽簿領束于成格不能一  
概除豁官民或借以爲煩擾之具公以爲非清帑無以塞  
僥倖去煩苛遂一以清帑爲首事福建布政司冊目十有  
一公于中分子目一千五百有畸於是支解者豪忝皆見  
吏不能欺得銀若干萬兩直隸民逋議分年隨輸官逋議  
分年罰繳得銀若干萬兩前後兩省凡清帑若干萬兩旋  
奉

特旨以兵部侍郎銜署直隸總督嘉慶十一年永定河溢  
公舟行視堵築九月庚午感急疾卒年五十有三遺表聞  
予實授總督卹典

賜葬銀五百兩碑銀三百五十兩祭銀二十有五兩諡恭  
勤配莊夫人禮部侍郎存與公女子六長元善

欽賜舉人候補內閣中書次元涓國子監生次元俊副榜  
貢生候補鹽場大使次元遜候補通判次元穆次元英孫  
開甲元善出女六皆適名族某年月日元善等奉

諭旨葬公于新建慈姑鄉之硃砂岡立碑設祭如禮敬于  
元善相習知公爲詳謹條其大端碑于墓道之左銘曰

文達蓄德是延恭勤上品之才如擢寒門截鵠斷犀導鋒  
微至精心一往用其不二遂涉吏事佩乎青朱囊封之言  
天子是俞治戎以和治事以肅大將柔心小胥重足甫授  
節鉞爲方鎮臣祁雨未周已墜其雲幽幽青原戴吾

君賜子孫繩繩于千萬世



前四川提督董公神道碑銘

高宗純皇帝乾隆四十一年大小金川平頭人七圖葛拉爾思甲布傳送

行在

純皇帝命軍機大臣問爲逆狀對甚悉復言陷底木達時四川提督董天弼將所部二百人抽短兵力戰不可敗夜半領兵頭人以烏槍數百幹環擊殺之先是在軍諸大臣劾董公失守要隘

純皇帝徙公之子聯毅等伊犁至是

赦還復聯毅舉人原資

賜內閣中書聯穀等乃招魂葬公于城南之兆公諱天弼字霖蒼先世明永樂中自無爲州遷太興遂世爲大興人曾祖大才祖承詔父其倫皆

贈明威將軍母劉氏

贈淑人公雍正十年武進士授四川提標前營守備從討占對升馬邊營都司從討大金川軍功加三等升戎邊營遊擊大金川旋請降罷師升章臘營參將調綏甯營再調提標中營率師討巴唐平之升維州營副將小金川與黨霸爭地公單騎入其境論以禍福兩土司皆聽命郭羅克者黑帳房部落也掠衛藏入貢刺麻僧公奉總督檄出黃

勝關察之郭羅克不承公夜合雜谷兵逼賊巢先發烏槍  
驚其馬羣馬盡逸賊不得遁生擒其酋麻茲滾布得所掠  
物事定升松潘營總兵旋

賜花翎升四川提督乾隆三十六年小金川酋僧格桑復  
叛圍沃日土司于達圍公由臥龍關往勦拔密耳賊據斑  
斕山死守公仰攻八日糧匱士卒拔草茹之不得已退軍  
至關大學士溫福公自雲南來亦至關公請統大軍堅守  
自將重慶兵一千循黃草坪救沃日道由金達山較斑斕  
尤斗峻不可上乃下令軍中求間道得近山得勝溝溝在  
兩崖間崖壁高數仞賊夾溝設守卡崖上會大風雪公將

健卒夜伏馬鞍行溝中賊守者皆不覺遂直抵達圍破賊  
達圍圍始解乘勝拔日隆關迎大軍會于關下時大軍久  
不得公軍問諸大臣已劾公逗撓而公以用奇大勝得免  
死爲卒伍將兵五百人守資利寨參贊額駙王色與公論  
軍事大奇之入請

賜副將銜拔曾頭溝升重慶營總兵拔卓克采復

賜花翎拔橫梗山梁抵谷葛復繞坎竹溝閒道進攻燒大  
木城一旁擊礮寨數十皆下連拔沒藥山大版昭復迎大  
軍會于布朗郭宗時南路參贊阿桂公亦拔美諾賊巢僧  
格桑由底木達賊巢竄入大金川大軍拔底木達是役也

公常爲軍鋒而得勝溝坎竹溝之捷冒死入險地以迎大軍功爲最三十八年

純皇帝聞大金川酋索諾木嘗助小金川

命溫福公爲定邊將軍討之

擢公爲四川提督守黨霸將軍奏底木達新定乃賊巢且諸軍要隘公宿將宜鎮之與兵五百人守底木達底木達當賊衝勢危甚而將軍復調兵三百赴大營其後路接應兵一千二百亦徹之當是時將軍自屯木果木軍屢勝之後不以賊爲意七圖葛拉爾思甲布等千餘人乘軍情因先後詭降將軍開軍門納之使雜廝養七圖安堵爾等因

得入大營誘降人爲內應且探知底木達兵弱無後援遂  
定計先犯底木達道通卽劫木果木大營六月初一日賊  
自山後擁衆來犯公遂遇害年六十二後九日賊劫大營  
將軍亦死焉公貌瓌瑋美須髯臨陣常身先士卒所向無  
前有哈薩克二赤驃馬極雄健將軍常索之公曰天弼上  
陣倚此二馬金川小醜必蕩平俟手梟二逆并二馬上將  
軍嗚呼孰知公之志以此竟不遂哉後

純皇帝命阿桂公爲定西將軍進戰皆捷僧格桑死獲其  
尸攻克索諾木賊巢于葛拉依俘送京師設鎮安營鎮其  
地如公所預策焉今

皇上御極錄死事後子公世襲恩騎尉公配吳夫人繼田  
夫人子六長聯毅由中書爲淮安府裏河同知次聯理與  
公同死事次聯璽縣學廩生次聯琛聯珩早卒次聯琯國  
子監生女七俱適名族公歿三十八年陽湖惲敬爲文刻  
石于公墓之左銘曰

天縱

高宗收諸逆夷歸四海家將將臣臣罪罪功功慄不敢譁  
公起遠疏志攫鯨鯢擲之泥沙將尊師微爲賊所窺來蹈  
其瑕生誣幾死死誣不生孰詫而嗟

高宗至明死興其孤生高其牙將士感銜

皇武所周廓無垠涯公神之行沛然江流勢不可遮二馬  
尙從厯塊蹴塵上躡蒸霞刻石墓左公顧領之我銘無夸



廣西按察使朱公神道碑銘

公諱爾漢字麗江姓朱氏先世自鄆遷餘姚曾祖名進祖大彬不仕父健遷大興官絳州吏目大彬健皆

贈朝議大夫前母林氏母熊氏皆

贈淑人公神明挺動有識斷能得人死力奴客悉以兵法部之自初入仕卽在行間後遂與教匪相終始少時吏于戶部以吏目分發甘肅署甯夏典史再署岷州吏目被議輸貲復官借補靖遠典史赴衛藏迎班禪額爾德尼入朝道聞熊太淑人之喪去官服闋赴甘肅候補時平涼鹽茶廳同豪田五作亂公與通判吳君廷芳知縣黃君家駒守

靖遠城賊仰攻一日引去靖遠回豪哈得成等一百三十  
有八人期夜半爲內應公鈎得賊情令守者悉登無驗不  
得上下漏初下乘馬至哈得成之門陽科其穀餉軍因拘  
焉所分遣捕賊人亦誘擒城下餘賊而賊雜守者在城上  
且數十人縣胥鐵光保最爲劇賊公登城給使獻刀卽反  
接以布抹其口直掖下城遂令鳴角城上捕賊人聞角聲  
皆拍賊肩曰視地賊視地則扼而反接之于是無脫者夜  
將半城外賊復引向城公呼語之復引去於是公以知兵  
聞升署隆德縣事諭底店據砦降回徙之補隆德縣知縣  
升直隸涇州知州預擒教匪頭目劉松并其孥升鞏昌府

知府嘉慶元年教匪起陝西白河湖北當陽亦起二年賊  
大入四川總統宜綿公駐達州檄公參軍事是時賊渠王  
三槐拒總統于方山坪白岩山者極險固賊渠林亮工樊  
人傑屯山上與方山坪爲聲援將軍舒亮公提督穆克登  
布公屯山前之韓彭坳公將成都兵三百募兵三千屯山  
後之排亞口排亞口之上曰金鳳觀曰草店曰鴨坪公一  
日盡攻克之復進有木柵當隘不見賊唯一犬號號然我  
兵有躍而攀柵者賊乃自厓旁引刀斷其指我兵擲火焚  
柵賊鳴鑼掣所樹旗左右招賊賊大至公慮斷後路退師  
時九月九日也先是與韓彭坳爲師期而韓彭坳之師中

道而綏賊得專力山後我兵不能克十月奉節賊千餘人  
援白岩公敗之擒賊渠邱廣福十一月白岩賊久困欲走  
傾巢來犯戰一晝夜不得路仍退至屯公以親博戰創甚  
同輩昌道遇河州總兵保興公曰君文官乃能爾吾輩當  
何如後保興公與王三槐戰于三匯遂死事三年公運甘  
肅麥十萬石餉軍行至成縣賊渠高均德將衆七千窺麥  
公與涇州知州沈君清都司馬君良棟敗賊于格樓霸生  
擒賊軍師李得勝四年賊渠張漢潮犯秦州公赴成縣會  
勦而鞏昌警至馳還賊已據城東駕鴛河公夜掠賊卡至  
城守始固賊不敢攻以功升鞏秦階道生番鐵布者世居

太子少師體仁閣大學士戴公神道碑銘

嘉慶十有六年四月戊申朔太子少師體仁閣大學士戴公薨事聞

皇上軫悼己酉榮郡王奉

命奠甲寅

皇上親臨喪次奠爵三戊午贈太子太師謚文端祀賢良祠壬申禮部遵行

諭祭禮是年十二月甲子公之喪至南昌越一年十一月甲申公之子嘉端遵行

諭葬禮葬公于南昌岡前嶺之兆立

祭葬碑如令式而神道之左禮宜銘先是公以省墓歸南昌敬見于丙舍公慨然久之仰視日舉酒曰吾身後文屬子矣子無辭時敬起立負牆曰願吾師爲富鄭公文潞公曾幾何時公遽捐館舍言之爲憮然然敬與弟子籍最先在京師視公含斂今復囊窶窶之事其敢自外謹次公之事如左公諱循亨字荷之一字蓮士曾祖時懋由江都遷大庾

誥贈通奉大夫

累贈光祿大夫曾祖妣傅氏周氏梁氏

誥贈夫人

累贈一品夫人祖佩

贈官如曾祖祖妣溫氏

贈封如曾祖妣父第元太僕寺少卿

誥授通奉大夫

累贈光祿大夫妣彭氏

誥封夫人

累贈一品夫人公年十七本省鄉試中式二十二應天津

召試

欽賜內閣中書直軍機處乾隆四十三年公年二十四會

試中式

賜一甲一名進士及第授翰林院修撰旋充湖北正考官復

命後奉

旨仍直軍機處充江南副考官督山西學政繼丁內外艱服闋充湖南正考官督廣東學政升右中允累擢侍講左庶子侍講侍讀學士嘉慶元年

皇上登極凡大典禮諸巨製悉出公一人公之受

深知膺

殊眷內贊

緝熙之業外宣



康定之猷蓋于是乎始二年

賜三品京卿銜隨軍機大臣學習轉少詹事升內閣學士  
補禮部右侍郎轉戶部四年

高宗純皇帝賓天

朝廷黜陟誅賞之事甚殷公夙夜攀慕且趨事遂疾乞假  
假滿兼吏部左侍郎五年轉戶部左侍郎六年教習庶吉  
士升兵部尚書十二月教匪平加太子少保世襲雲騎尉  
八年調工部十年調戶部充會試總裁直

南書房十二年協辦大學士充

經筵日講起居注官翰林院掌院學士充順天府鄉試正

考官十三年奉

命視南河

予假省墓十四年

皇上五旬萬壽加太子少師十五年授體仁閣大學士管理工部事務十六年三月

皇上以綏懷西北屬國幸五臺公扈從臨發送敬于正寢之門復理前丙舍語敬愕然不敢對辭去閏月

回蹕公途次得疾至正定疾甚奉

命歸京師治疾馳至

圓明園邸第敬往問公不語二日矣是日遂不起年五十

有七敬允惟唐宋以來羣輔肩背相望然或賢矣而不得其時則節耀而功不暨得其時矣而不得其主則業豐而禮不終若夫功暨禮終朝野動色而世有先賢之狀家藏舊事之錄褒揚過溢漸至攘誣斯亦古者大臣之心所必不敢承者也惟我

聖清一家作述

太祖

太宗肇造丕基

世祖

聖祖并包寰海

世宗

高宗以勤以養訖于無外厯溯

國家創業守成諸大臣皆翦翦粥粥如不勝衣其床懿之  
謨鴻讜之論敷陳密微者

朝廷時布之遠邇以爲天下光蓋有道之世進退之權毀  
譽之柄皆自上操之道固如此前敎匪戡定

皇上以公知無不言言無不盡

詔天下公薨復申繹之而公所面取進止雖同直勲舊大  
寮及公之親屬無有能知其說者於是而知公之爲

國家非淺近所能測識不可沒也公性清通無聲色之好

朝退四坐皆士大夫言人人殊公不置可否而

朝廷設施有見之數月數歲之後者其燕閒之論則以爲  
先代黨禍皆驟加摧落有激而成若以事漸去之必無他  
變論度支主減費守常賦論治河主謹隄防不改道而論  
三省教匪則以爲小醜跳梁無遠略當以忠勇將帥驅殄  
之勿使文臣支格其間此卽公立

朝大指也公娶陶夫人子一嘉端徐宜人出年始十一  
欽賜舉人世襲騎都尉銘曰

王澤之和萬物承之芄芄益益在于所施河收其洶山斂  
其嶠篤生哲輔如磨如錯始對大策遂冠仙瀛出馳

使車入奉

樞庭

皇上龍飛試之心膺操圓循規引方合矩蕩乎而升芒乎  
而作景星在天青狼自落雲駛月運舟行岸移扁之當楫  
爲萬事儀如何徂謝曾不崇朝丹旄南來霜冽風蕭兼金  
之純大玉之粹巧鏤萬變其真則貴九州四隩視此刻辭  
後世之公敢告不欺

張臯文墓誌銘

張臯文名惠言先世自宋初由滁州遷武進遂世爲武進人曾祖采祖金第父蟾賓皆縣學生母姜氏臯文生四年而孤姜太孺人守志家甚貧臯文年十四遂以童子教授里中十七補縣學附生十九試高等補廩膳生乾隆五十一年本省鄉試中式明年赴禮部會試中中正榜例充內閣中書以特奏通榜皆報罷是年考取景山宮官學教習五十九年教習期滿例得引

見聞姜太孺人疾請急歸遂居母喪嘉慶四年今

皇帝始親政試天下進士加慎臯文中式時大學士大興

朱文正公珪爲吏部尙書以臯文學行特奏改庶吉士充  
實錄館纂修官

武英殿協修官蓋臯文前後七試禮部而後遇年三十有  
九矣六年散館奉

旨以部屬用文正復特奏改授翰林院編修七年六月辛  
亥以疾卒年四十二臯文清羸須眉作青紺色面有風稜  
而性特和易與人交無賢不肖皆樂之至義之所在必達  
然後已其鄉試中式文正以侍郎主考臯文自出其門未  
嘗求私見以所能自異默然隨羣弟子進退而已文正潛  
察得之則大喜故屢進達之而臯文斷斷以善相諍不敢



隱文正言

天子當以寬大得民舉文言

國家承平百餘年至仁涵育遠出漢唐宋之上吏民習于寬大故奸孽萌芽其間宜大伸罰以肅內外之政文正言天子當優有過大臣臯文言庸猥之輩倖致通顯復壞朝廷法度惜全之當何所用文正喜進淹雅之士臯文言當進內治官府外治疆場者與同縣洪編修亮吉于廣坐諍之亮吉後以上書不實遣戍赦歸田里臯文則竟死矣方臯文爲庶吉士時今

皇帝加上

列聖

尊號

盛京

太廟舊藏

寶例遣官磨治篆所加

尊號刻入之臯文以能篆書受廷推言于當事者宜自京師下所司等上上玉刻成遣使奉藏其舊藏

寶不得磨治當事者以爲然格于例不果奏又言于當事者翰林院乃

皇帝侍從奉

命篆

列聖寶宜奏請駢驛不得由部給火牌亦格于例不果奏  
已而歎曰天下事皆如是邪吾位卑能言之而已臯文篆  
書初學李陽冰後學漢碑額及石鼓文嘗曰少溫言篆書  
如鐵石陷入屋壁此最精晉書篆勢是晉人語非蔡中郎  
語也少爲辭賦嘗擬司馬相如揚雄之言及壯爲古文效  
韓氏愈歐陽氏修言易主虞氏翻言禮主鄭氏元始至京  
師與王灼賓麓陳石麟子穆及敬友最善嘗曰文章末也  
爲人非表裏純白豈足爲第一流哉臯文娶于吳子成孫  
女適國子監生董士錫銘曰

大學山房詩集卷四  
車掣馬攻駕千里隆隆之輪躡于阨勿乎臯文誰訊此銘  
之幽局俟來祀

舅氏清如先生墓志銘

先生諱環字清如一字夢陽自號東里居士而清如之字特著士之能學者皆稱之曰清如先生先生少時喜兵家言後出入于縱橫家法家最喜道家雄雌白黑之說推陰陽進退人事盈歉其緒餘爲步引芝菌神鬼誕欺怪迂之術皆好之爲文章峭簡精強必已出讀書條解支劈鑿虛躡空旁挾曲導必窺意理之所至四十後爲陸象山王陽明二家之言已又以爲未盡反之張子邵子之說蓋先生之學凡五變而精力亦彫涸不足以赴所志矣然好古求是克治彊勉爲之于天下不爲之日有篤老不變者先生

教人諄諄必數千言反覆之如剗心著地示以必信如旁翼後推必引之康莊坐之輿室不計其人何如亦時或不置一語而意已可喻先生接人腐生賈客田翁皆欲導之于善而責貴人爲甚常言爲己一介不可苟爲天下計不可守苛節無益于時時獨身至海塘河工度地勢求

聖祖

高宗之所講明者疆圉之當事一再見屏勿恤湖北教匪初起先生以爲嘉勇貝子方以勦逆苗駐湖南苗自守賊不足慮宜急徹兵至湖北期一月掃除勿使蔓延昏暮走大學士誠謀英勇文成公及大學士忠襄伯之門欲白事

門者拒之最後至大學士諸城劉文清公之門得入文清公謝不敏遂怒而出而城門已闔不得已宿于護軍校之廨舍其拳拳于世如此年二十四補縣學附生二十七補廩膳生五十一充歲貢生五十七本省鄉試中式六十六大挑二等留京師恭與

千叟宴七十選甘泉縣訓導嘉慶十一年十一月甲子卒于官年七十七曾祖留耕府君諱垣祖琢菴府君諱章府學生父賓石府君諱之罕府學生

贈贈文林郎甘泉縣訓導前母段孺人母卜孺人皆

贈太孺人配朱孺人子二長旦興順天舉人以好奇遠遊

不知所往次旦勲國子監生女一適袁穀孫良弼國子監  
生旦興出同產姊一適卜師誠妹一敬母太孺人也先生  
出滎陽鄭氏始遷祖光遠南唐保大中自歙來丞晉陵遂  
世爲武進人南唐以前系絕無可考其附會皆非也銘曰  
南宋季葉以儒居奇賀公與卿其下擁徒鈎帶百千或攘  
而爭有明變學別推波流背古式程子于縫掖爲詭爲迂  
大道其盲惟我

聖清束天下術收之

朝廷士愿而循應科厯官如水地行先生大呼排道學門  
衆睽且驚如負千鈞夜登崇阿杲不得征繫聞先子先生



之學廢人任已任已之極刻思而一通天地始廢人之極  
外無應者卒隘于理聖門狂狷不逆所稟行乃不違嗚呼  
先生至勤言勞知者其誰

前臨川縣知縣彭君墓志銘

嘉慶十一年

皇帝厘念江西吏治

簡刑部侍郎金公光悌巡撫其地金公爲當世鴻達敏毅君子以好士名天下問士于僚佐僉稱臨川縣知縣彭君淑第一金公曰然然臨川吏民許其縣官事違格非

奏請解所任意其事無以直縣官十二年三月癸卯朔批摺下軍機處奉

旨革職拏問是日彭君遊南昌城南適病寒歸邸舍少飲卽僵臥越六日戊申竟不起十八日庚申軍機處

延寄乃至江西金公爲不怡累日臨川多姦蠹素稱難治  
知縣屢以訐去官前行臺省擇能者以屬君君引疾敬強  
起之至縣卽以法發遣黠吏黃河清等故爲其黨持短長  
遂敗嗚呼可哀也已君字谷修秋潭其自號也湖北長楊  
人乾隆三十五年

恩科鄉試中式大挑一等分發江西試用知縣委署瑞昌  
戈陽縣事題署崇仁縣知縣丁本生母劉太孺人憂服除  
起署瑞金縣事題補吉水縣知縣大計卓異引見奉

旨回任候升旋署浮梁縣事調臨川縣知縣凡爲知縣十  
九年行臺省以君年勞題署廣信府同知未及引

見而卒年六十一曾祖上達祖廷芝縣學生父商賢本生  
父祖賢候選教諭妻官氏子二長富柟浙江試用知縣次  
人檀縣學廩膳生女三長適同縣劉倬次適東湖候選從  
九品甘清次君卒後二月乃生側室吳氏出君治縣一意  
振厲所至皆有聲爲人精悍而言笑儻蕩裘馬室宇皆鮮  
整酒酣論古今事騰躍揮霍不主故常期可施之于實用  
詩深峭無近今浮華習氣前署瑞金屏賓佐獨身赴縣途  
次卽撿治惡少年數十輩一日判一百八十餘牘皆竟召  
學官弟子登縣東山作重九淋漓飲賦敬至瑞金時人士  
尙能言之不置也銘曰

宋元郡縣勢積輕鞭械之外無餘刑顧役久踞姦所并丞  
簿尉史各意行閭豪偷長交縱橫吏卒逐捕無尺兵誑購  
得姦縛囹圄所犯十罪九息停其一上言獄不平檄催獻  
狀流如星或竟置對口與爭垂囊長吏儕黔萌一朝掣挽  
弓絕弮張趙坐罪皆虧名嗚呼彭君古健者收淚勒此幽

臺銘

兵部額外主事王君墓志銘

君諱育琮字秉玉世爲武進人曾祖滋生祖家梓國子監生父光燮以進士起家終福建連江縣知縣母白氏生母黃氏君自爲諸生好高吟大嘯不循俗流矩度而內行修潔無疵與人交無城府邊幅乾隆五十三年鄉試中式明年會試中式

殿試

賜進士出身授兵部額外主事武選司行走部中諸曹故事掌印郎中主可否其次郎中員外郎其次主事若額外主事雖同官以後進嘗嚴事諸僚掾史持牘至視已名署

訖不敢問如呈牘于尙書侍郎所隨諸僚刺促行次立俟  
署已乃退尙書侍郎亦不問一言如未見者君至部意有  
所否則不署時湖南接捕苗匪上功狀不平郎中以下皆  
已署君曰吾不能爲此尙書命改牘平之諸僚知其誠不  
忤也京朝官雖倍祿時苦乏君以不治生益困正月朔不  
能具朝衣冠入

殿門陳賀旦日偶驅車過所知駐

大清門外下車九叩首人大非笑之君曰屬者吾發于心  
不能自已不叩首不能復上車行公等所謂禮非吾所及  
也噫君之心于

朝廷嚴摯如此使得竟其用肯飾纖芥以欺

朝廷哉君能篆書爲文縱麗自喜以嘉慶元年七月甲子卒於京師年四十一娶吳氏繼娶徐氏再娶黃氏無子以仲弟寶雲之子成錦叔弟育璣之子成鉞爲嗣成錦國子監生成鉞順天舉人八年正月丙子葬于城東之原銘曰玉之駟石之砢也無珉之尤也竹之溝節之曝也無萑之摻也性壹氣行堅直不可燦也琢之雕之鏤之羽之聖人之求也



甯都州學正聞君墓志銘

乾隆三十一年

上命王大臣以身言差天下舉人之久次吏部者一等試知縣二等試學正教諭訓導著爲令曰大挑更數年一舉行至嘉慶六年而聞君星杰與焉先是海內殷繁

朝廷至行省臺皆法令具備知縣但據案行文書而坐擁脂膏不肖者遂以爲囊橐其賢者不日遷去或十年卽建旌節於是舉人皆願爲一等聞君儒者不以爲然當推排位廷中以十人爲班主者援筆曰第七可一等卽有宣聞君名者聞君久之曰星杰第八耳於是改置二等聞君出

語人曰以冒得官雖三公吾不爲也十年授甯都州學正  
十一年十二月初九日壬午卒于官年五十有五陽湖惲  
敬聞之曰聞君蓋能不妄進者于法宜銘按狀君諱星杰  
字羽儀世爲袁州萬載人年二十七充府學生三十七補  
廩膳生三十八鄉試中式曾祖歸從九品銜祖達國子監  
生父望光府學生妣易太孺人生妣王太孺人配王孺人  
子三宗恕宗旭宗弼弼縣學生銘曰

青原沈沈石隙隙中有幽宮白日揜三公何盈君何歉以  
禮爲室廉爲門彼貴苟得非吾倫子孫勿忘視斯文

袁州府訓導李君墓志銘

君諱步廷字瀛仙姓李氏先世自吉州遷甯都世爲贛州府甯都縣人

本朝升甯都爲直隸州遂爲州人曾祖成泰祖國良父榮母邱氏君年二十一補州學附學生三十四鄉試中式三赴會試不第大挑二等選袁州府訓導乾隆五十七年卒于官年五十有二君文辭修飭其行事造次必以禮一門之內雍雍然娶曾氏繼娶羅氏子四長彬州學附學生曾出早卒次楨州學廩膳生次作雲國子監生次振玉州學附學生女二長適彭次適邱皆羅出

本朝學校之官府曰教授州曰學正縣曰教諭其佐皆曰訓導以師道爲官任儒者多樂居之其不肖者以官冷不可耐常與府州縣官之不肖者比而爲熱熱甚或遷而爲縣以至爲州府官或熱甚而敗或熱未甚而敗而訓導不掌印其熱者常與教授學正教諭之掌印者相拊求其以德藝與諸生切劘能其官往往不可得敬自至新喻去袁州百餘里卽聞李君賢至瑞金去甯都亦百餘里益聞李君賢皆以爲能其官敬分校所取士賴生池有學行復介君之子楨來受經楨復介其從兄諫相見皆知孝友于世事退慎將卜葬李君以銘請敬于是不愧爲李君銘銘曰

其身康其慮定其趨道也徑故君子爲熱不如爲冷也車  
馳奔與禍隣吾誰歸歸李君

饒府君墓志銘

本朝取士之制監于有明而遞損益之乾隆五十一年  
定第一場試四子書文三首五言八韻排律詩一首第二  
場試五經文五首第三場試策五道敬嘗言文者精神之  
所動才力德度之所見故自將相及有司百執事其能不  
能俱可于三場決之而老師宿儒硜硜如斷斷如守先王  
之道待後之學者與聖賢大小純駁不同然皆各有得力  
老死而不自足嗚呼是亦有取士之責者所宜知也敬充  
江西同考官得卷呈主考三呈三見屏徹闈後來謁爲副  
榜貢生饒廷訥因得盡讀其文于所謂老師宿儒蓋無愧

焉廷訥復以尊府君狀請銘蓋前後五世皆高才生而皆不遇可感也已按狀府君諱珊字仲節姓饒氏先世自靖江遷彭澤之寶梁阪曾祖萬英祖有任皆縣學生父鞏歲貢生雋都縣訓導母賴氏繼母胡氏府君少力學補九江府學生屢應鄉試不得解而子廷訥補九江府學生遂罷舉嘗告廷訥曰仕以利人度不能不如無仕世之仕者未嘗求名夫名不可求也而世乃求利焉何也府君歿于嘉慶二年六月庚辰年六十有四娶歐陽氏生子四長卽廷訥次廷謹次廷諄國子監生次廷誣謹誣早夭女如男之數長嫁府學生曾杰次嫁縣學生周大觀次嫁高鳳次嫁

曾瑛銘曰

味也者孰知其正色也者孰知其正吾又烏知貴之非賤  
富之非貧邪又烏知翕翕者之愈而泠泠之反病也噫



饒陶南墓志銘

狗馬牛皆四足。儻牛者察筋骨毛尾蹏角。知其強弱之質。順逆之性。修促之數十。不失一。然移之馬。則不知移之狗。益不知移之虎豹犀象。則望而走。今夫龍亦四足也。使龍加首于牖。儻牛者驚怖視之。其又奚知而四足之外充之。爲無足爲多足。其又奚知。雖然是儻牛者于牛固十不失一也。稍下十而失四五焉。再下十而失七八焉。蓋天下物不可限。惟盡性盡人性盡物性者。知亦不可限。其餘皆限之類。如此彭澤饒廷詡。爲人端慎。能文章。最長于江西五家四書文之法。奧衍清瀏。無有能得其用意者。前後應十

五舉不得解

乾隆五十三年

恩科已得而復失之充副榜貢生以貧投經南昌嘉慶十  
四年十月二十四日寄死于橋步街藥肆年五十不能殮  
其友憚子居與同志殮之歸其喪于彭澤爲之銘使其子  
禮葬之廷訥字陶南曾祖有任祖輩父珊母歐陽氏配宋  
氏子文敷銘曰

以貧死以貧葬以賤死以賤祭一客不弔亦不悔魄歸黃  
泉魂上天爲銘永之千萬年

彭澤縣教諭宋君墓志銘

江西東南並嶺嶠州縣以十數縫掖之士萬人其著于世者于瑞金曰羅君有高于新城曰魯君士驥于雩都曰宋君華國三人皆以贛鄧自軒先生元昌爲本師其學宗子朱子其言守前明薛文清公

本朝陸清獻公如積矩然後羅君遇家難遁而攻浮屠氏之書魯君奔走令長非其好棄去獨宋君官儒官始終行其意故其爲文羅君奧衍而多俶詭之詞魯君端雅自惜邊幅宋君則冲夷如不欲爲文敬初至江西三人皆已沒世得其文讀之常推見其爲人瑞金陳生蓮青受業于宋

君宋君之子惟駒與陳生交謀宋君寃寃之事因陳生以  
銘來請按狀君名華國字甫宜自號立厓居士先世由廬  
陵遷雩都之賴村曾祖敬禧縣學生祖日景早世父啟收  
恩貢生母譚氏君年二十爲縣學附生明年爲廩膳生年  
三十充拔貢生五十選石城縣教諭旋丁太孺人艱服闋  
署吉水縣訓導補彭澤縣教諭引疾乞長假卒于嘉慶八  
年十一月戊申年六十有九配劉氏子二長惟駒舉人次  
惟駟縣學廩膳生君壯歲而孤家貧授經以養母太孺人  
忘其貧官石城迎太孺人養署舍朝夕無倦容及太孺人  
卒適大雨山水驟至壞署舍君號于神太孺人柩卒無損

伯兄昌圖艱于子爲三置妾竟舉子季弟光國早世君聞其名則掩耳而走終身皆然官石城吉水教士以禮毋忘于其業毋訐訟以爲常敬嘗考江西道學之傳于朱子之後一傳爲劉子澄黃直卿子澄臨江人直卿久官于江西皆不愧其師說再傳爲向涪饒魯已離其宗三傳則多爲詭僞之士所託有絕可歎詫者自軒先生奮于百世之下追而從之君與羅君魯君同事自軒先生乃各有所就蓋志氣之彊弱性情之緩急天時人事之推禮皆于學有消長進退異同之故其始甚微而其積甚巨大賢以下皆然不可不察也敬于羅君魯君止讀其文于君兼得考其

行事以爲喜幸爰不辭而爲之銘銘曰

以問學爲入以文行爲出其于道也至則如晝之日不至則如夜之月然聖人之教不越路不由徑者車行地無異轍人行地無異跡也不循其轍不蹈其跡是爲無行地之說噫如君者其知之其能知之

甯都營參將博羅里公墓志銘

公諱博羅里字祥卿國拉記氏鑲藍旗富明阿佐領下人  
聖祖仁皇帝康熙十三年發關外精勇實京師公之曾祖  
松窩羅隨檄入關早卒祖阿里瑪父史達驍騎校母那拉  
氏公以將家子爲護軍擢護軍校護軍參領先後凡三十  
八年

高宗純皇帝歲幸熱河

獮木蘭圍場皆從其他

幸所亦從今

皇上嘉慶元年兵部舉年勞引

見奉

旨發江西以參將補用是年署建昌營遊擊三年隨勦義甯州教匪有功旋署甯都營參將營制把總以下升授巡撫總兵官主之千總以上總督主之江西營屬兩江總督故總督兵房吏權極重與副將以下爲兄弟稱公于例當卽補甯都營參將兵房吏以書通公罵其使曰吾

皇上領兵大員如苟且何面目見

皇上若主胥也吾與若主何兄弟兵房吏遂撫事倚之不得補四年署袁州營副將十年署撫標中軍參將十一年復補甯都營參將去前署甯都營八年矣公曰此命也吾



何尤公短小須眉稜起不讀書天性剛介其嫉惡如不勝如不欲容之于世然能改則歡然相從曰當如是也在官不以家累從自寢室至廳事埽除必潔器必整犁且卽起自拂牀榻盥漱畢衣鞞危坐日出治軍書接賓已復危坐日晡射矢十日入卽息以爲常奉入之外不侵將士一錢亦不令他人得侵之故將士皆敬公終日侍無懈者凡遇總兵官過所部公出奉銀二百兩葺垣舍峙芻茭以所餘置頓曰

朝廷將士冒風雨寒暑來豈可不一餐外此吾不敢所屬都司守備欲助公公不允曰吾多所餘諸君有身家身家

安乃可爲

皇上盡力勿以吾故令諸君乏也戰守兵亦有身家諸君能諒之足矣總兵官聞之常先造謝待以殊禮甯都有在籍大官甫識公舉厚饑以進公曰朋友之饋無不可雖然若未知吾何如人不可饋吾不知若何如人亦不可受少遲之異日定交後可耳牙中兵夜直千總營千總姣之兵走訴公公訶曰何得汙長官逐出千總喜明日公坐便坐呼軍吏具申文劾于總廢弛請革職而以前訴別書稟同函申三日後千總知上劾闖然至堂皇大詬一營皆不平請杖之公曰彼有老母劾其官罪當矣以此事得杖何面

目復生是殺其子母也于是甯都民大悅公出皆擁觀以得見誇于人刑部尙書金公光梯巡撫江西聞公名調署撫標中軍參將公進退以禮會有急獄繫四人發中軍其一人當繫未得指揮後呼囚止四金公斥之公曰參將不知獄情大人指揮繫四人參將不敢五也如參將面從受大人斥是長大人過大人何用千里調一面從參將爲中軍是日金公下演武廳試騎射公拍刀侍甚久金公勞之曰少休好參將也十三年復署袁州營副將十四年以疾乞長假十五年四月五日卒于南昌私館年六十七是日尙危坐日晡始就臥曰吾不起矣時敞在南昌視公含歛

加詳公娶母氏之黨生于玉福禮部祠祭司拜唐阿孫喜  
忠喜明七月二十四日玉福來江西扶柩歸京師敬因次  
公行事素所見知者俾志公之墓銘曰

狷之絕物自高如狂而遇所施先峻其防失至于隘我與  
公同

盛明之朝人亦見容啟手啟足公行不復我愧沾沾云何  
其淑

張府君墓志銘

敬始官江西新喻卽聞永豐張瓊英有行能學術新喻鄰  
永豐而瓊英官瑞金縣學教諭去千數百里不得見及敬  
調瑞金瓊英已官安徽天長縣知縣而瑞金士大夫皆賢  
之飲酒必舉瓊英所居曰鶴舫先生時臨我出其詩曰此  
所贈也少年必相尙曰我鶴舫先生弟子也後敬以公事  
赴南昌道出吉安時瓊英以疾去官歸授經青原山中相  
遇今年復相遇于南昌瓊英棄知縣願就府教授敬以此  
高之瓊英以尊府君狀請志銘敬不敢辭按狀府君名奏  
勲字匡世縣學廩膳生

勅封修職郎瑞金縣學教諭世爲永豐人曾祖眉友縣學生祖審干父振舉拔貢生雩都縣教諭母郭氏府君性而易喜爲文章教子弟有禮法生平不佞佛亦不斥佛曰吾爲儒儒之道自盡而已凡道書丹經皆不觀曰修身謹疾而已天下豈有仙人嘉慶十一年七月二十八日卒年七十配聶氏

勅封孺人十二年七月十八日卒年七十一是年九月一日葬于東坑之原二十九日聶孺人祔焉子三瓊英字珩實嘉慶六年進士饒州府教授次瓊芝次瓊荃皆縣學生  
銘曰

二氏溺人徧大九州盡未來際居貴當富冀延福命惑同  
婦寺其中賢智好談精渺雲縱波肆肌血貫注如父子性  
師師弟弟豈知律教溢爲禪悅義外立義上昇不驗遁言  
尸解守尸尸敝全真之說以仙援佛類彼非類而爲儒者  
後身先口以諍而諍吁嗟大道爲識所界萬端破碎府君  
持論能平則正勿謂近易刻之堅石永永無泐爰告後世

刑部主事曹君墓志銘

君諱惠華字迪諧一字山甫姓曹氏宋寶慶中兵部尙書  
彥約自歙遷都昌十傳至廷賓自都昌遷新建之蘆阮三  
傳至文寶自蘆阮復遷魯江君曾祖家甲福建龍溪縣知  
縣祖繩柱福建布政使父穎先候選州同知妣萬氏君年  
十九爲南昌府學生次年爲廩膳生乾隆四十八年江西  
鄉試中式五十八年會試中式六十年

殿試

賜同進士出身以內閣中書用是年考取軍機章京嘉慶  
二年補內閣中書三年充山東副主考四年充方略館纂



修七年升刑部江蘇司主事九年充方略館提調十一年  
總辦秋審十二年二月初九日卒于官年五十有七配彭  
氏子二紳業綈業女長適候選從九品熊文濬次適太學  
生彭邦彤君貌豐下須眉羅羅然進止語言甚溫雅而耳  
重聽語非促膝不聞所官內閣及刑部皆繁要又督攝皆  
天子親信才德重臣故少年厲鋒穎求合反多不得當君  
以重聽聞于勲舊諸老先生皆加意察之然君從容十餘  
年無一事齟齬者

憲皇帝雍正五年設軍機處論者以爲如宋之樞密院然  
樞密院止掌兵事與中書省並重而已

本朝軍機處主受天下之成如宋中書平章事主內制如宋翰林學士主徵發賞罰功罪如宋樞密使三者惟明之內閣兼之今內閣在

午門不能常見止與擬進呈軍機處在

乾清門大臣每面取

進止益嚴重故軍機章京常急速趨事以爲能然君亦從容十餘年無一事齟齬者嗚呼諸老先生能容君與君能見容于諸老先生足以稱矣先是

純皇帝南巡君獻賦

行在

賜緞二匹後君外舅彭文勤公元瑞直

內廷

純皇帝清問及之朝士以爲君成進士必

賜及第而竟列三甲內閣侍讀員缺例用內閣中書一人  
軍機中書一人故行走者皆洊陟侍讀會直隸總督題十  
三州縣被水復題誤爲十二君正之

皇上嘉其勤朝士以爲君必擢侍讀而竟以平教匪議敘  
升主事若是者其命邪然非君能安之何以及此君能詩  
善篆分不恒作行書正書皆精能畫山水學南宋溢爲花  
鳥人物草蟲得其意然多偶然爲之不殉貴游請屬自君

之曾祖祖以進士起家羣從悉貴盛而君從父文恪公秀  
先以待從官六卿君生長世胄始終清素自守有寒門所  
不能者君歿後一年紳業綈業自京邸扶柩還新建將卜  
葬以敬與君爲鄉試同年生請銘銘曰

收視者明返聽者聰餘于道則其事習其藝工故形之選  
非德之充也

外舅高府君墓志銘

府君姓高氏名光啟字曙初世爲武進人曾祖爾傅江浦縣教諭祖閻江西萬年縣縣丞父希準

勅封文林郎妣程氏

勅贈孺人文林君推產兄弟洎府君長而家益貧文林君磊落不爲意程太孺人常早起無可炊則危坐鼓琴府君聽之淒然傷不能養脫身走京師就太孺人之弟文恭公景伊于邸第已而太孺人卒因移家依文恭文恭清厲自守無所餘府君則藉客授所入以養親前後七應順天鄉試不得解四庫館膳錄考滿選山東荷澤縣縣丞署定陶

武城齊河縣事調汶上縣縣丞擢掖縣知縣考最署平度州知州其時大吏有以縱恣伏法者連僚屬多人法至死戍其中有不幸者而府君適以失囚幾上劾急捕得免曰疇官之法可知矣吾豈可危吾親遂乞養歸府君之弟沅陵縣縣丞桂在湖南并呼之歸曰吾宦雖不成然視入都時足以養矣與弟共之可也歸五月而文林君卽世又十年府君終不出卒于家嘉慶五年八月丙寅也

勅授文林郎掖縣知縣例授奉政大夫候選同知年六十有五府君性淳篤未嘗以聲色加人而吏事修舉人不能欺少日往來文恭邸第十餘年其時同州如劉文定綸之

清慎錢文敏維城之警健莊侍郎存與之淵雅皆

朝廷偉人文恭則以長者在崇班中能持正無所阿徇府君請益諸君子而言行則性近文恭故能善其始終內外如此敬赴江西時常拜府君于庭後歸而見府君同產妹之夫趙甌北先生翼觀其文章議論邁往無等追思府君之爲人溫然盎然與先生若有逕庭而終身相厚善蓋各安其中之所獨至者使敬得侍文恭其志意氣局又當何如而惜乎其未及見也府君娶孫宜人繼吳宜人子二長德英候選府通判沅陵君子府君子之繼府君卒次德洋候選知縣吳宜人出女三長歸于敬次適國子監生徐士

熾次適劉焜望二十年九月戊子卜葬于城東五路橋之

原銘曰

宜于已宜于人譽兄弟繩子孫兆于斯奠幽室以甯爲天  
靈爲日天昭日明永無極



楊貫汀墓志銘

明南京國子監博士楊澹餘先生以任爲瑞金文學儒者  
其七世孫曰縣學廩膳生元申字貫汀能文有行檢敬初  
至瑞金貫汀學焉兄五人其三人前卒曰元棗字美汀曰  
元芻字牧汀皆縣學生敬皆得交美汀不久卒敬以計吏  
入都及返而貫汀已卒問牧汀牧汀亦卒嗚呼瑞金如貫  
汀方可進于古之學者而兄弟相繼頽落如此澹餘先生  
年三十五未竟用世之志著述未畢業今貫汀亦年三十  
五不大可感歎貫汀卒于嘉慶十五年九月十九日曾祖  
方堅祖于昭皆縣學生父其恂母張氏貫汀娶于賴子會

九銘曰

殤非夭彭非修如其然吾何尤

徐恭人墓志銘

嘉慶八年五月甲辰朝議大夫南昌府知府楊君燁之恭人徐恭人卒于治所之內寢九年子鼎高書高以朝議之命歸葬于陽湖城南之原恭人世爲武進人曾祖永甯大理寺左評事祖朝柱內閣中書候補主事父熊占福建福州府通判前母楊安人母高安人繼母楊安人恭人年十八歸朝議自朝議爲庶吉士及知縣于柘城商邱固始平鄉同知于南安袁州恭人皆從其卒年五十有二

勅封孺人進宜人恭人子二鼎高太學生考取實錄館謄錄書高太學生女四長適商邱拔貢生陳彬次適仁和太

學生金孝集次適同縣鹽運分司湯貽恩其季字吳縣太  
學生張昆元朝議狀恭人曰恭人嫺婦儀事繼母得其歡  
心逮事先大夫涪州府君而事先太恭人陳太恭人二十  
餘年以禮如一日好讀書尤悉于史事予性慤當官無所  
避常讀馮道傳詆之恭人曰長樂老名節埽地矣雖然其  
所遇之人何如哉虎豹蛇蝎而能使之皆馴當必有道矣  
惲子居曰大哉此言天下爲君子者能知所以處小人之  
道則下無鉤黨之醜上無棄賢任佞之敗然惟有名節者  
方可議處小人而能處小人者其名節又必如泰山大河  
磊落汪洋可信于天下後世之匹夫匹婦方爲善耳恭人

不可不銘銘曰

婦德愉愉氤兮若蘭玉珮鏘鳴以肅以歡紘纒大帶及于  
滌瀾蒸蒸之化視斯則已有美碩人宜于厥家敬相夫子  
如輔在車立朝之要一言曰益憎主詢多毋構于隙鳳凰  
不擊驚鳥革心麟之般般嶽嶽在林凡百君子其敬聽之  
貞珉不泐永此刻辭

甘宜人祔葬墓志銘

甘宜人奉新人曾祖諱汝來太子太保吏部尚書諡莊恪  
祖諱禾禮部主事父諱立功翰林院編修母熊氏浙江巡  
撫諱學鵬女也宜人年十九歸南昌曹君庠業曹君以拔  
貢生授玉山縣訓導厯知浙江武義錢塘福建龍溪諸縣  
遷知廣西新甯州奉

特旨知四川直隸茂州調瀘州署夔州府事先宜人卒宜  
人卒于嘉慶八年六月二十三日年四十有五以十一年  
二月己丑祔葬于新建城西曹君之兆子二長熊舉人候  
補內閣中書次熙女二長嫁南昌候選從九品鄔宣諭次

許嫁吳縣國子監生蔣兆鄂江西入

本朝大家之守家法者于南昌府所隸曰曹曰甘曰熊曰  
彭曰裴皆起家侍從至大僚而曹氏自地山先生秀先以  
重厚端實爲

朝廷大君子甘與熊兼著治幹風節宜人熊之自出教成  
于甘而女于曹故才質德行皆有儀法昔韓退之志京兆  
韋夫人援詩碩人之義以敘宗親蓋大家子孫顧惜門第  
而女子益爲繩矩約束多適于禮者敬爰按中書之狀比  
其事以銘宜人之幽使後有所考焉銘曰

膝下婉婉服于聲詩不嘖之言王母色怡言歸于曹重闈

是養綏纓有節煥寒無恙割田而貸脫珥而輸姻族熙熙  
以義爲腴夫子之型子也是式勿爲秋霜煦之以日綿綿  
荒原松楸永存宜人之德施于孫孫



姜太孺人墓志銘

本朝之制命婦不得以節旌門所以教士大夫之家守禮明讓也張臯文曰

聖天子整一海內激揚大典輕重以倫法備矣若爲子者之心以爲有列于

朝吾母不寵旌門將以邀

天子之命不幾于以子之貴加母之節歟其罪與沒親之善等臯文成進士改庶吉士其明年當以

高宗純皇帝升祔禮成

覃恩海內因亟呈牒禮部爲母姜太孺人請旌門事下府

縣然後復呈牒禮部如庶吉士例

賜孺人始卜日改葬臯文師友多大官爲文章宗師顧以敬之言爲不欺後世屬之銘嗚呼臯文可謂能事其親者矣按狀太孺人武進人父本濰縣學增廣生母胡氏太孺人年十九歸臯文尊府君同縣府學廩膳生蟾賓二十九而寡貧甚日不得一食卒守志不易撫孤以託于成人乾隆五十九年十月十八日卒卒年五十九子二人長卽臯文名惠言孤始四歲翰林院編修次翊遺腹生縣學生女一人適國子監生董達章銘曰

之死難甯飢死而不死尤難而甘之及三十年宜其子之

賢也

李夫人墓志銘

嘉慶十年四月乙丑前資政大夫巡撫廣西南康謝公啟  
昆之叔子學垌葬其嫡母李夫人之柩于新建大山之原  
去夫人之卒十有九年矣先是資政之仲子學崇與學垌  
議葬事既定于正月赴都下補官而孟子學增早卒其孤  
振晉傅重與季子學培皆幼故夫人之葬惟學垌釐其事  
加詳且以兄學崇之命爲辭請敬爲之志夫人資政同縣  
人曾祖執中歲貢生祖上謙父逢湛國子監生母王氏夫  
人年十五歸資政于南康後三十五年爲乾隆五十二年  
正月甲申南昌私第火夫人卒年五十

誥封恭人晉贈夫人子四學增二品蔭生候選主事繼室  
劉夫人出學崇嘉慶七年進士翰林院庶吉士學垌候選  
員外郎皆側室盧孺人出學培候選府同知衛孺人出孫  
振晉二品蔭生夫人生女一盧孺人生女一管孺人生女  
三高孺人生女一自資政爲庶常編修夫人常從及資政  
外爲鎭江知府移揚州甯國亦從其卒也資政以甯國府  
知府家居用五行家言緩葬後資政由南河河庫道擢浙  
江按察使遷山西浙江布政使最後巡撫廣西皆遠宦間  
以上事道出南昌不及葬迨資政卒用形法家言不合葬  
夫人素賢能逮下及見學增學崇之生學垌學培皆後夫

人之卒始生而學垌竟克葬夫人亦夫人之賢其得于子  
義與命宜如是也銘曰

夫邪子邪貴邪富邪夜宮其晝邪已焉哉

董孺人權厝志

吾常董潯州思駟以戶部員外郎出守卒于官恭人高氏與敬妻爲同高祖姑姪恭人之女董孺人歸國子監生楊鼎高鼎高從其尊府煒守南昌而孺人歿于官舍日者言歲陰所在法不宜葬遂卜日權厝于城南之原孺人年十七于歸歿以嘉慶八年正月甲子年二十有九去姑徐恭人之喪不及一年去先後丁孺人之喪逾一年蓋南昌與鼎高及鼎高之弟書高二年之間相繼遭此變故是可哀也已而孺人之母高恭人居本貫鼎高亦以事回里均未得臨孺人之喪子三嘉寶應寶三寶女一皆幼小失所

特重可哀也已敬以姻族知孺人之賢教于室而宜于楊氏之家爰爲之銘曰

生慈于姑死從之心勿悞也先後之不年天爲之不知其所然也母也天只勿損所安也吁嗟所生惟夫子怙之勿棄捐也



亡妻陳孺人權厝志

孺人武進陳氏名雲父士甯母鎮氏孺人年十九歸同縣  
憚敬日繡高昌棉十兩織日得布一匹自先大人太孺人  
與敬悉衣之二十六敬赴試禮部遂畱京師太孺人以孺  
人多病禁勿織孺人撚雜線感之爲菊牡丹鳳子鵲鷄數  
十類俱創意不襲舊式或綴雜綾絹爲之率三日可得白  
金一兩助甘旨暇則讀論語孝經蓋如是者十年敬終不  
成進士就知縣始從官于富陽二年調江山旋聞先大人  
之喪孺人以疾歸遂不起年三十九時嘉慶二年閏月丙  
辰也生子以道女玉嬰皆不育烏乎可哀也已先是敬官

富陽時大吏非意侵辱敬以禮拒之適湖南苗擾辰沅間  
因急檄使護銀十五萬兩餉軍道出賊中孺人聞檄至驚  
得旬膈疾而代者日求敬公事缺陷欲擠之以快大吏不  
得則以小事惱敬家口孺人畏憤疾益篤及敬餉軍役返  
上事江山常小差後卒以是疾死烏乎人孰不願其夫之  
仕者然未仕不過勤苦而已既仕乃至如此此豈可盡委  
之于命邪敬蓋自尤之不暇而暇他尤邪以是年十一月  
辛未權厝牛車之西阡敬喪先大人始祥禮不宜有所撰  
著然事愆有非他人所可言者沒之又不忍禮亦宜許自  
言遂爲之銘曰

名乎有詭成者矣而願之乎而不願之乎宦乎有巧達者  
矣而善之乎而不善之乎遇乎有日豐者矣而獨歉乎抑  
吾之歉而歉而乎其若是儉乎噫

女嬰壙銘

惲敬子居之女嬰生于乾隆四十八年七月八日時敬館  
陽湖橫林之徐氏三月後一歸視之明年正月往京師又  
二年敬方遊太原五月十六日嬰以痘殤葬居西師子墩  
屬武進縣通江鄉九月家問至太原後嘉慶二年嬰之母  
陳孺人卒無子敬蓋年四十矣感奔走之苦身世無所就  
而勞恤如是追埋銘于嬰之壙前前五步志永傷焉銘曰  
吾未見嬰之生也而死亦然曰是爲天屬其疑于薄也盍  
悔旃

國子監生周君墓表

敬治新喻之三年召鄉三老求孝弟于家恤千里黨者旌其閭于是國子監生爲琳縣學廩膳生爲瓚狀而請曰先人之棄琳瓚在嘉慶五年二月丙申八年十月乙酉葬于西郭之北原分宜林大任銘諸幽今明府君陳高義激揚吾喻之人能哀先人而表其行是賜先人以不朽也敬惟昔者歐陽文忠公爲乾德令表屯田員外郎李仲芳以石隄捍水有功于縣民應山處士連舜賓賙貧匱者卒後二十年文忠公亦表之遂不敢辭按狀周氏世居吉水之泥田十七世祖長卿爲新喻教授遂家新喻君諱志濂字江

臣入貲爲國子監生處父母兄弟能歡爲祠堂祀元公爲始祖祭器衣服皆備祭田若干畝贏以周宗之人縣有緱山書院燬于火君復置之率縣人修孔子廟以餘力爲屋十二楹館縣之試行省者縣漕二萬四千石君以倉隘增徙之復請于縣爲社倉于雲路門至今貧者得賈其穀蓋君之力于事以施其德多如此曾祖天民祖可從父廷標母傅氏君卒年八十有二娶同縣廖氏子爲琳女適縣學生胡繼良繼娶山陰祁氏子爲瓚女適縣學廩膳生萬介齡敬旣次周君之行乃揚于衆曰人之善性也雖然爲之者必視其分焉世嘗有秉均軸擁麾節所行得罪于天下

後世而鄉之人懷其惠尸而祝之者是不明于大小公私之分而已夫有天下之任者以利天下爲善有一州一郡縣之任者以利一州一郡縣爲善有一鄉之任者以利一鄉爲善如周君所爲令秉鈞軸擁摩節者爲之無增于其身之善亦無減于其身之惡何也大小公私不相敵也今周君處下竭其才量爲善于其鄉皆視其分爲之且周君爲其分之所宜爲訖有事實功效垂之永永蓋非虛辭揖讓取長厚名者所能至其足爲爲善者坊乎遂書之碣而列于墓左

浙江分巡杭嘉湖道陝西候補道李公墓表

國家倚東南財賦而浙江居十之三大府總督浙江福建者行部過浙江所取州縣公使銀且二十萬州縣力匱則盜正帑應徵索而歲稽其

上供之數以後歲所供掄之自前協辦大學士覺羅吉慶公巡撫浙江躬廉潔率屬歲哀所餘益帑總督徵索悉不應其爪牙支格者悉以禮遣之行之數年而浙江之財賦大贏其時左右吉慶公提綱舉凡使眾畫一者曰分巡杭嘉湖道李公嗣警敏強毅君子也公山東金鄉人字逸翰曾祖忬祖爾傑皆縣學生父來鵬副榜貢生妣周氏公以



乾隆三十八年進士補祠祭司主事升儀制司員外郎郎中改福建道監察御史升禮科給事中轉吏科掌印給事中除分巡杭嘉湖道署布政使一署按察使再以周太恭人年老乞養歸後服闋赴部奉

旨發陝西以道員用旋以疾歸卒年六十有六公在禮部以清謹聞充雲南副考試官以能得士聞爲御史給事中以敢言聞有列卿之子旨得官公發其罪同官有庇囚者公亦發之

高宗純皇帝常下

特旨獎其伉直巡視中城北城明科教肅姦宄平道塗飭

市城衆不敢犯赴官陝西抵畱霸廳教匪大至公募鄉勇拒守七晝夜賊始退畱霸獲全移駐興安奏記領兵大臣請鄉勇各守堡無調發有警則互援自是鄉勇心始固教匪不能侵多解散者在行間與衆共甘苦上下山谷皆單騎歷險阻忍飢渴以致得疾不竟其用論者尤惜焉始公之在浙江也吉慶公知公賢事皆取決而總督以前事銜公會公復署按察使義烏民何世來等倡邪教相署置造違禁物有以急變告者公曰此愚民耳白吉慶公毋以兵過江自馳至義烏檄府縣官次第縛之以邪教奏而總督得守備報具反狀奏之且擁重兵自福建向浙江揚言

浙江縱反者當窮治吉慶公大撓公曰福建摺過浙江屬耳今浙江急驛以邪教所署置及違禁物續奏可先達

至尊

至尊知福建邀功不錄也後得

旨令總督還福建毋妄動終公去職總督未嘗能以聲色加公後一年總督之事遂敗敬初仕浙江公已交替嘗謂公公貌循循然如無所能者而浙中大小吏言及公之抗總督皆動色以爲不可及嗚呼屬官不敢犯大府虞其以法相中耳一嚔笑一指揮不敢逆而公乃驟褫其公使銀至二十萬其毒公當何如然大府之技充之至以黨逆中

人止矣而公脫然始終名高身泰雖公之智計足以投抵  
閒隙摧落機牙然非

宸衷之抑邪異穹之右善何以至此其至此則人理天道  
之的然可見者也世之俯首終身如檻羊繼犬者亦奚爲  
哉亦奚爲哉且敬嘗計之一行省可減二十萬十行省卽  
可減二百萬歲歲儲峙不外驛不私沒朝廷內撫諸夏外  
御屬國用何患不充事何患不理用充事理則有司取之  
于民何患不平况乎不徇大府之欲僚屬必不敢汙不屈  
大府之威政事必不敢暇一事就軌萬理咸備敬均可爲  
天下決之公之行甚修事甚辦而此一事所係極重又敬

仕浙江時所習知者故推論以表公之肝使後世有所興  
起焉公配周恭人繼配周恭人側室朱宜人子四庭芬國  
子監生候選州同知庭禧拔貢生南城兵馬司指揮庭業  
優貢生正白旗官學教習庭英幼女三長適候選縣丞周  
嘉謨次適周之勉次適候選知縣楊大勳嘉慶十五年十  
一月初九日庭芬等葬公于金鄉小樓庄之兆陽湖惲敬  
謹表

王盛墓石記

嘉慶元年浙江富陽縣知縣惲敬解餉軍銀十五萬兩至貴州銅仁交納役旋經江西豐城隨行民壯王盛物故葬之城西高原五年赴任新喻爲立石墓次盛亦歿于王事也後之君子勿侵毀焉可也

鸚武冢記

憚子居上新喻助前事陸九鐸公錢二百餘萬九鐸報以鸚武一架相隨十年瑞金受代居新建狸搥鸚武傷脾而死余伯維葬之園中紫檀梅花樹下賢愚經曰須達長者有二鸚武一名律提一名睺律提聞阿難說四諦歡喜持誦後爲狸所食展轉生天凡七返復生人中得辟支果嗚呼佛經三藏蓋十之八如賢愚經焉

祭張臯文文

維年月日謹于新喻之崇慶寺設位致祭于吾友張臯文  
之靈曰四瀛茫茫日月何邁目胷心掩已矣誰儔吁嗟臯  
文產于同州有唱予和有酢余醕豪攢英族子拔其尤前  
攀愈躬旁睨師侯百世之行萬人之學雷絕電歇河截其  
流吁嗟臯文作噩之春同謁文學揖予于門宛兮清揚其  
神則尊予弱而狂一語未申單闕之舉子罷予解北上折  
翼噉于中野歲舍四遷厥宮巨蟹子偕郡計卸車都下逆  
旅相值比戟交弓秦齊一馳屹乎西東志合心齊如金在  
鎔澄沙汰礫以精爲同聚散之跡垂載十五遇蓼求甘得



齊慮苦春官駸放歸途載阻共職四門艱屯可數遶條構  
屋月僦半千土堙炎炎石炭親然其塵刺鼻漲地燄天瀝  
水橫堂敗壁臨筵鷄栖有車駕驥以俟伸指論值計錢當  
里均茵而乘斂衣覆履搖搖凌淖舠艫在水待假而裴待  
質而炊不肥斯臞母覩于危籤今而友揚古而師一語脫  
唇萬目睽睽子吏于浙子憂去官視予富渚開余以寬綿  
綿疾疚言與死隣子決爲活冀道之伸子葬先子子官于  
朝白璧耀光匪襲可韜公卿側席首乎羣髦予亦來都注  
官于曹渝水官符朝下夕赴送予闔閭頓輒而語誰知死  
別成此終古訃來當食投箸吐哺無爲爲善斯言太苦吁

嗟臯文人孰不貴仁義如子之勉焉勿棄子知其難易皚  
皚之白勿拭則滓吁嗟臯文人孰不願富貴如子之儂焉  
勿及予知其得失滔滔之轍勿詭則躓吁嗟臯文生不昏  
情死其有知千里行匱勿淹勿危妻單子稚內外誰支念  
此零丁惻愴肝脾葬子崇岡二甫能力伐石之辭惟予是  
職尚饗

無錫宣頴達麗中

同校

吳縣徐敦仁愛杉